

3829 Prewo.

25

71


Georga III^{ca}

San. Augusta

Oratio
 ad
 Stanislaum Augustum P.^o
 per
 Antonium Eugenium Lectorem
 Curiaie habita.
 1766.

4^{to}

Georga



ANTONII EUGENII VICECOMITIS
ARCHIEPISCOPI EPHESINI
SANCTAE APOSTOLICAE SEDIS
LEGATI
A D
SERENISSIMUM ET POTENTISSIMUM
POLONIAE REGEM
STANISLAUM AUGUSTUM
ET
INCLYTOS ORDINES
IN
REGNI COMITIIS
SOLEMNITER CONGREGATOS
ORATIO

HABITA VARSAVIAE
PRIDIE IDUS NOVEMBRIS ANNO MDCCLXVI

ANTONI LEGENI VICE COMITIS

ARCHIEPISCOPI EPHESENSIS

SANCTAE APOSTOLICAE SEDIS

LEGATI

AD

SERENISSIMUM ET POTENTISSIMUM

POLONIAE REGEM

STANISLAUM AUGUSTUM



IN

IN

REGNI COMITIS

COLLEGIUM CONCILIATORUM

ORATIO

HABITA

FRIDRICHUS HORNBERG



15756 7

Respicienti mihi saepe numero (Serenissime & Potentissime Rex, Celeberrimi & Nobilissimi Ordines) Respicienti mihi saepe numero, totumque praeteritae vitae meae curriculum studiosâ quadam recordatione obeunti, nulla profectò seu jucundior, seu reverà melior ejusdem pars occurrere consuevit, quàm postremum hoc septennium apud inclytam gentem vestram felici, faustoque omine exactum. Gravissimo siquidem Pontificii Legati munere ornatus, atque perfundus, non in eam modo regionem translatus me sensi, ubi comitas, hospitalitas, antiqua morum sinceritas mirum in modum elucerent, summoque haberentur in pretio, verùm etiàm ubi avita Religio caeteris virtutibus longo intervallo anteiret, Catholicae puritatis nitorem, & decus ingenti gloriâ praesferret, flagrantissimo denique studio a cunctis ordinibus colebatur. Quae scilicet eximia, nullisque laudibus satis extollenda propensio vestra cum & sanctissimis mei Principis curis, & praecipuo missionis meae consilio egregiè responderet: equidem gestiebam animo, mihi que summo perè gratulabar in ea me incidisse tempora, quae rei bene ac naviter gerendae viam quasi sternerent, & paratissimos aditus patefacerent. Sed eheu! (a) *Quomodo repente obscuratum est aurum, mutatus est color optimus?* Quam denique sub ipso meae Legationis exitu exoriri video tempestatem, quas nubes Polonum hoc caelum obruere, quos fluctus Petri naviculam circumagere? Exhorrescit animus, Serenissime Rex, Sapientissimi Legillatores, exhorrescit sanè, & refugit animus quoties mecum ipse recogito, heterodoxos homines non modo mitissime a vobis exceptos, sed & in sinu vestro enutritos, sub umbra alarum vestrarum protectos, maximis beneficiis devinctos, novas res hodie moliri, omnia miscere, in manifestam Religionis perniciem conspirare, exterorum opem ad obtinenda quaecunque cupiunt palam exposcere. Jam vero quem sensum Beatissimo Patri Nostro Clementi Tertiodecimo Poloni nominis apprimè studioso fuisse censetis cum haec audiret? Id ego vobis sanctè affirmare queo, supremum illum totius Ecclesiae Pastorem tristissimi nuncii moerore adeò fuisse perculsum, ut nihil unquam paternis visceribus acerbius expertus fuerit, mihi que conceptis verbis mandaverit, ut veram Religionem in tantum discrimen adductam & quantâ possem animi contentione tuerer, & vobis omnibus quàm enixissime commendarem. Quò igitur Pontificiae sollicitudini & pro publico Legati officio, & pro maximo rei pondere solemniter satisfacerem, in conspectu Regiae Majestatis, in istâ Comitiorum frequentia, & celebritate Catholicam causam dicturus huc accessi, confidens fore, ut Pater Luminum mihi det os, intellectum, sapientiam, for-

B

titu-

(a) Jerem. Thr: 4. a. 1.

titudinem ad exploratam pietatem vestram adversus omnes Dissidentum conatus opportunè communiendam.

Tametsi Polonicos Annales cum perlego plurima ad Nationis honorem, & incolumitatem praeclare cogitata, gesta, sancita admirari contingat, quae sapientissimam testantur rerum vestrarum administrationem: nihil tamen consultius reperio saluberrimis legibus ad servandam Catholicæ Religionis integritatem & conditis, & confirmatis. Ac reverà illud peculiari quadam Omnipotentis Dei Providentiâ usuenisse arbitror, ut nullae vicissitudines Persuasionem vestram evertere, aut e Regni fastigio deturbare valuerint. (b) *Verè digitus Dei, verè digitus Dei est hic!* Quis enim nescit, totum finitimum Septentrionem omnigenis erroribus jam pridem corruptum, vitiatam sacrorum disciplinam, deletam Romani Pontificis auctoritatem, ingentem opinionum licentiam longè latèque grassantem? Quis nescit ipsam hanc Poloniam aliquandò & civium, & exterorum proterviae patuisse, quorum erat omnium mira impunitas? Quicumque aut ob crimen, malumque in Religione sensum patriâ ejectus fuerat, aut ne legibus coerceretur, sponte se ablegaverat, ille in Poloniam veluti in asylum se recipiebat. Ex Germaniâ, ex Galliâ, ex Italiâ perditissimi corruptores aderant, ac prohibente nemine, & inanissimo quoque dictis applaudente, sua somnia venditabant, profligatasque doctrinas in vulgus effundebant. Sed in eo præsertim Nationis vestrae virtus enituit, ut neque iniquitate temporum, neque finitimarum gentium exemplo, neque novarum opinionum contagione in tam periculosa cæli plagâ affari se, abripique pateretur. In eo divina Providentiæ virtus enituit, ut quaecunque ex potentissimis hujusce Regni Familiis a verâ Religione miserandum in modum desciverant, eae vel penitus extinguerentur, vel maturè resipiscerent, atque ad novam lucem emergerent. Vos verò ubi Religionem vestram e vadis, ac scopulis circumjacentibus liberam præstare potuistis, præteritis periculis edocti quomodo factam, testamque custodiretis diligentissimè cogitastis. Hinc optimæ illae Constitutiones, quæ inter immutabiles Serenissimæ hujus Reipublicæ Canones principem locum obtinent, eximiae Constitutiones ad Fidei tutelam, nimirum ad Populi salutem, quæ suprema lex est, ordinatae. Hinc perpetua illa vestra ergà sanctam Romanam Sedem observantia, quâ nempe apud omnes Christiani nominis gentes inclarescitis. Hinc indelebilis illa veneratio, quâ Summorum Pontificum Decreta divinas res respicientia, veteremque disciplinam firmantia vobis ultrò accipienda esse intellexistis. Quo fit, ut non Reges tantummodò vestri pulcherrimam *Orthodoxorum* appellationem jure optimo impetrasse dicendi sint, sed & tota generosa Natio Polonica eodem nomine insigniri, & nuncupari mereatur. Numquid ergò in hodiernis calamitatibus animum despondebitis, vobismetipsis minores eritis, gloriamque tot seculis partam indecorè elabi sinetis? (c) *Numquid vobiscum abbreviata est manus Domini?* Eja (d) *induite vos armaturam Dei;* agitur enim, mihi credite, agitur de summâ rerum. Petunt Dissidentes aequalem in hoc Regno cum Catholicis conditionem; vobiscum in hoc Senatu assidere conantur; Reipublicæ munera, honores, dignitates affectant; liberum Religionis exercitium, cujuscunque tandem furfuris ea sit, sibi concedi contendunt; dissoluta Sigismundi Augusti tempora, quorum memoriam ex annalibus vestris deleri expediret, ad hanc aetatem revocare, ac veluti quoddam morum exemplar posteritati vestrae commendare velleat. Quid quaeso, quid exitiosius excogitari potest, quam novissimæ istae Dissidentum petitiones? Quanquam quid dico petitiones? Jam ab ipso hujus orationis exordio non supplices petendi vias insisti, sed maximas excitari turbas, sed imperiosa quædam ratione vobiscum agi accepistis. Enimverò nullum non lapidem movent, nihil reliqui faciunt hi Catholicæ Religionis adversarii, ut quid-

(b) Exod. 8. c. 19.

(c) Isaiæ 50. a. 2.

(d) Ephes. 6. 11.

quid valdè volunt, cumulatè consequantur. Quod si vos faciles, si timidos, si perperam cautos, si propositi parùm tenaces invenerint, adeo ut suffragia vestra corripere, aut extorquere possint, jam nunc dico: vae vobis, vae filiis, vae nepotibus vestris! Cavete enim, per Deum cavete existimetis, majestatem Catholicae Religionis vel imperantis diu stare posse, si Lutherò, si Calvinò, caeterisque Heterodoxorum antesignanis januam aperueritis. Equidem mihi videre videor priscae sanctitatis instituta omnia seu vi sublata, seu novorum rituum opprobriis inquinata, & polluta, quemadmodum & aliis Europae regionibus, quas opus non est memorare, fataliter evenisse legimus, etsi fortasse leviora essent morbi principia. Video multitudinem in contraria studia diductam, & multiplici Cultus specie implicitam a recto Fidei tramite miserrimè deerrare. Quid plura? Novos homines in his vestris subselliis mihi videre videor falsorum quidem dogmatum praejudiciis imbutos, sed ingenio, gratiâ, divitiis, rerum usu pollentes, qui fortunae & audaciae intemperantiâ elati non modo Jura, quae Catholicis favent, infringere, vel abrogare, sed & progressu temporis viam sibi ad Regnum quaerere non dubitabunt. Sed quamvis etiâ Dissidentum ambitio, dimissa odiosissimâ illâ aequalitate, moderatius procedere videretur, iterum vobis dico: cavete. Cavete, & vigilate ne Religionis vestrae candor vel minimâ labe tangatur; probè enim calletis quàm sit pura, quàm sancta, quàm intemperata, quàm denique ab omni vetiti Cultus consortio aliena. Quapropter non modo publicum damnatarum Religionum exercitium a Regno vestro totis viribus eliminandum esse decerneris, sed ne aede: quidem privatas, quae *Oratoria* vulgò nuncupantur, Dissidentibus concedi posse arbitrabimini. Quid enim est aliud, amabo vos, haec ipsa Oratoriorum concessio, nisi mera Catholicae Religionis, legumque ab eâ praescriptarum violatio? Quid est aliud heterodoxis ministris concionem e suggestu permittere, nisi iis falsae doctrinae validius insinuandae potestatem facere, quamobrem & eorum auditores errorem ardentius depereant, & veritati pertinacius adversentur? Quid est aliud profanam *Coenae*, uti vocant, celebrationem tolerare, nisi eosdem Ministros ad sacrosanctum Eucharistiae Mysterium mimicè contaminandum quodammodo allicere? Cavete igitur, iterum, ac tertio cavete, & vigilate; illudque rectè perpendite, Religionem vestram non modo pravos actus reprobare, sed & omnes homines, qui pravis actibus quomodocunque anam praebent, condemnare; non tantum varias Dissidentum sectas, sed & quoscunque Dissidentum fautores abominari, tamen non intimâ erroris persuasione, aut dilectione, sed aliis humanis impulsibus incitatos. (e) *Nolite quæso Fratres mei, nolite hoc malum facere.* Praeterquam quod si haec *Oratoria*, quod Deus avertat, a vobis permitterentur, putatisne idcirco Dissidentes eâ moderatione usuros, ut nihil imposterum postulaturi essent? Toto caelo erratis quicumque id creditis, neque callidorum hominum ingenium satis peripetum habetis. Ego verò etiâ eâ de causa nihil Dissidentibus concedendum autumo, quia nempe si vel unum hodie concederis, nullum deinceps petendi finem a Dissidentibus fieri videbitis, qui facilitatem vestram semel experti, eò alacriores, novisque instructi auxiliis ad oppugnationem revertentur, nihilque a se impetratum reputabunt, dum aliquid superfuerit impetrandum. Neque profectò vellem, ut quispiam vestrum speciosâ nescio quâ felicitatis imaginè illectus ex proposito Dissidentum incremento mutatam Poloniae faciem, Civium frequentiam, Artium culturam, uno verbo publicum bonum liberaliter sibi polliceretur. Videte, si me auditis, diligentius videte quo loco sint res vestrae. Hodiernum Poloniae statum introspicite, & enucleate. Perpendite an verisimile sit, eos, qui Dissidentum causam potenter patrocinantur, magis de vobis, quàm de semetipsis esse sollicitos. Animadvertite, an prudenter sit expectandum, Dissidentes, qui nunc tempo-

ris Regnum hoc vestrum tantoperè divexant, tranquilliores apud vos fore
 cum & numero, & opibus, & auctoritate florentiores evaserint. Exquirite
 tandè an vera Populi felicitas, & intestina discordia bene conveniant, unâ-
 que in sede morari possint. Verumtamen demus ex hac Religioni libertate
 evidentem in res vestras derivari posse utilitatem; numquid propterea im-
 mortalis vitae lucrum caducis emolumentis posthabendum esse statueris? (f)
*Quid prodest homini si mundum universum lucretur, animae vero suae detrimen-
 tum patiatur?* (g) *Multa quidem bona habebitis, si timueritis Deum & recesser-
 itis ab omni peccato,* & Majorum vestrorum Religionem intactam servave-
 ritis, in cujus conspectu sordent omnes divitiae. Caeterum quaecunque im-
 pendeant pericula (h) *viriliter agite, & confortetur cor vestrum omnes, qui
 speratis in Domino; Dominus enim dissipat consilia gentium.* State animis, bonâ-
 que spe fulti cunctas Dissidentum machinationes consilio, pietate, fortitudi-
 ne evertere studete. (i) *Si videtur difficile in oculis populi, numquid in oculis
 meis difficile erit? dicit Dominus.* Non ego vobis ut Dissidentes vel opprima-
 tis, vel persequamini auctor ero, cum eos Legum vestrarum patrocinio per-
 frui jam pridem noverim. Bonos ipsi cives se praebant; jura, quorum tu-
 telam efflagitant, venerentur, & colant; Catholicam Religionem omnino
 perturbare desinant; vos verò vicissim, quae legitime polliciti estis, quaeque
 vestram mansuetudinem consulentes ad Dissidentum commodum sanxistis,
 religiose, diligenterque servate. Porro unum exoro, unum est necessarium,
 ne videlicet illis quidquam ulterius concedatis. (k) *Ne transgrediamini ter-
 minos antiquos, quos posuerunt Patres vestri.* Id cunctis Ordinibus in hoc am-
 plissimo Senatu congregatis etiam, atque etiam commendo, Tuamque in pri-
 mis auctoritatem imploro, Stanillae Auguste Rex, in quo nempe totius Nati-
 onis oculos defixos conspiciamus. Cum enim propter maximas tuas, & omni-
 no regias virtutes, incredibilem animi praestantiam, miram ingenii vim, in-
 titimam patriarum legum peritiam, luculentam doctrinae omnis cognitio-
 nem ad summum hunc Majestatis apicem totâ Poloniâ, vel potius Europâ
 acclamante, evehctus fueris, quàm multa abs te postulentur, quàm praeclara;
 quid tibi, quid Populo tuo debeas satis profecto vides. Ac reverà perbre-
 vi unius biennii spatio beatam hanc Rempublicam eâ sagacitate, eo successu
 administrasti, ut sexcentis in eandem collatis sive ornamentis, sive commo-
 dis, communem expectationem vicisse potius videaris, quàm exaequasse.
 Decora, fateor, & valdè commendabilia magnanimitatis tuae monumenta,
 Serenissime Rex; at verò difficillimis hisce temporibus maximum tibi para-
 tur & constantiae, & gloriae periculum. (l) *Quia diligit Deus Populum su-
 um, idcirco posuit te Regem supra eum,* ut Catholicam Religionem in tantâ re-
 rum perturbatione tibi manus tendentem sinu tuo peramanter suscipias, ab
 omnibus, & singulis Dissidentum idibus quàm validissimè defendas, nihil,
 plane nihil ex ejus nitore, ac puritate detrahi, nihil in ejus detrimentum
 emanare patiaris. Quanquam quid opus est, ut Orthodoxae Majestati Tuae
 eximiam tantae rei necessitatem fufius ostendere laborem, cum me toties
 familiari colloquio humanissimè adhibitum de integerrimis animi tui co-
 gitationibus ultrò certiozem feceris? Memini, piissime Rex, ingenti cum
 voluptate memini quàm disertè sincerissimum tuum ergà Apostolicam Sedem
 obsequium, peculiaremque ergà regnantem Xpi Vicarium, & optimo Filio
 dignam benevolentiam mihi significaveris. Memini, te mecum de recon-
 ditioribus Fidei nostrae mysteriis adversus minuros hujus aetatis philoso-
 phos peracutè differere solitum, ut quam corde tuo sanctè colis Catholicam
 Religionem, hanc intellectu, & ratiocinio arctius arctiusque complecterere.
 Sed quanam evidentior Fidei tuae demonstratio, quàm quae mihi proxi-
 mo

(f) Matth: 16. 26.

(g) Tob. 4. 23.

(h) Pfal. 30. 25.

(i) Pfal. 32. 10.

(k) Prov. 22. 28.

(l) 2. Paralip. 9. 8:

mo superiore Interregno tam luculenter emicuit? Cum enim invidiosus quidam rumor tunc temporis percrebuisse, te ad quorundam Principum amicitiam facilius captandam, cuique studium latius in Polonia propagandum, Dissidentum partibus impensius favere, nobilissimam incensus indignatione in hanc sententiam me alloquutus fuisti: *Ego vero malevolis, & obrectatoribus meis, qui mihi iter ad Regnum intercludere conantur, reliquas artes lubentissime ignosco, hodiernam tamen notam, quam mihi calumniose inurunt, tolerare prorsus nequeo.* Si enim tam obliquo tramite ad summam potestatem mihi pergendum foret, profecto mortem oppetere, quam imperium adire mallet, ut nempe veram Religionem, quam & interiore, & exteriori cultu constanter profiteor, totius mei sanguinis effusione testarer. O egregios, verèque Catholicos sensus, quos ex amplissimo hoc loco elata voce repetere & praedicare gestio, ut nimirum intelligat tota Natio quem, & quam religiosum sibi nuncupaverit Regem! Id sanè intellexit, deque felicissimam electione jam tum sibi gratulata fuit, cum ad aras provolutus supremo Regum Regi Pacta Conventa solemniter iurejurando sponderes, gloriosa Serenissimae hujus Reipublicae Pacta, quorum illud praecipuum: *Catholicam Fidem, ejusque Jura sine ulla exceptione servare*; alterumque huic affine: *nullis muneribus, nullis privilegiis Dissidentes augere.* Id intellexit, sibi que iterum gratulata fuit, cum terribile illud sacramentum tam fervidam ad Populum oratione confirmasti, ut rivus lacrymarum eliceret, omniumque animos potentissime permisceret. Id etiam nuperrime intellexit, sibi que gratulata fuit, cum hanc ipsam Religionis causam in hoc Senatu eloquentissime propugnatam & splendidis verbis, & manifestam approbatione excepisti. Quid igitur superest, Serenissime Rex, nisi ut eximios sensus abs te toties, tantoque cum apparatu promulgatos in hodiernis Catholicae Religionis angustiis fidelissime comprobet, omnemque Dissidentum spem omnino praecidas? Verum ab egregio ac bene animato Principe tempus jam est ad vos orationem meam convertere, praevalida Ecclesiae Dei propugnacula, spectatissimi Antistites, quos duplici ingenti munere cohonestatos suspicimus, Sacrorum nempe perficiendorum, & Reipublicae procurandae. Estne quidquam seu coram Deo, seu coram hominibus hac potestate vestram pulchrius, aut honorificentius? Sed quandoquidem tum ad Ecclesiae, tum ad Reipublicae clavum sedetis, eo vos ad tantum onus sustinendum oportet esse fortiores. Summus quidem Pontifex quam praeclare de vobis sentiat, quantum in vestram prudentiam, pietate, constantiam fiduciam collocet, vobis etiam postremo non obscure significavit. Vestrum est bene conceptam ab illo spem & idoneo sermone, & rectè factis diligentissime implere. Absit, absit, ut quemquam vestrum seu privatae utilitatis studio corruptum, seu flagitioso discordiae spiritu afflatum suspicer. Una auctoritas, una Fides, una voluntas vos ducit, uno agmine adversarios vestros adoriendos esse cognoscitis, uno impetu eorum audaciam infringendam, conjunctis viribus infectas pecudes a purissimo Jesu ovili repellendas. Jamque ego in ardore vultuum vestrorum inflammatos animos vestros, & verè igneam sollicitudinem conspicio. (m) *Aemulamini ergo, Pastores optimi, aemulamini hoc tempore charismata meliora;* (n) *in doctrina, in integritate, in gravitate bonorum operum exempla praebete;* (o) *clamate, ne cessetis, quasi tubae exaltate vocem vestram;* (p) *praedicate verbum, instate opportune, importune arguite, obsecrate, increpate;* (q) *ita loquimini non quasi hominibus placentes, sed Deo, qui probat corda vestra.* Neque sanè a vobis, Amplissimi quotquot adestis

B 2

Polo-

(m) 1. Cor. 12. 31: (n) Tit. 2. 7. (o) Isai. 58. 1.

(p) 2. Tim. 4. 2. (q) 1. Thess. 2. 4.

Poloni hujusce Senatûs Patres Conscripti, minora quàm ab ipsis Episcopis in hoc Religionis discrimine expediamus. Praetermissis enim luculentissimis argumentis, quae vos ad tuendam libertatem vestram omnemque perniciosae indolis innovationem ab hac patriâ propulsandam excitare debent, nonne illud exploratum, & compertum habemus, nihil vobis antiquius esse, quàm honorem vestrum pro aris, & focus sustinere? Nonne scimus honorem hunc ipsum in Fide a Majoribus vestris acceptâ potissimum statui, quam ad extremum vitae spiritum illibatam servare, illibatam Filiis vestris tradere vovistis? Profectò (r) *quaerentes primum Regnum Dei terrena omnia bona vobis adjici sentietis; (s) vobis boni Legislatores eritis; vobis Consiliiarii fideles manebitis; Deus autem, qui universo mundo dominatur, dabit vobis sapientiam, scientiam, intelligentiam, cognitionem; (t) eritque in latere vestro.* Vos denique, vos omnes unâ voce compello, qui nobilissimum Equestrem Ordinem in solempni hoc Polonae Reipublicae Confessû repraesentatis, eximii Legati, vos oro, obtestorque, ne Religionem vestram quomocumque a Dissidentibus laedi, ulloque vulnere labefactari committatis. Id accurata officii vestri ratio efflagitat, id existimatio, id probitas, id justitia, id semper vehemens Coetûs vestri pietas certatim sibi vindicant. Quid in Provincialibus Comitibus penè omnibus Fratres vestri super gravissimo Religionis negotio, vobis praeceperint nec ego ignoro, & vos probè recordari debetis. An ergò officio, & fidei deesse vos posse putabitis? An eam ipsam Religionem, cujus dignitatem paucis ab hinc diebus tantoperè suspiciebatis, cujus bonum communi assensu, atque adeò fremitu urgere videbamini, hodie a vobis vel parvi pendi, vel prorsus negligi obstupescemus? (u) *Currebatis bene, quid vos impedit?* Estne aliquis vestrum, qui tantam exprobrationem se mereri sentiat, qui à propositâ sententiâ turpiter discesserit? Ego verò neminem, planè neminem ex Polonis Legislatoribus ejus ignominiae reum existimavero; sed si quis fortè imprudenter defecisset, tu, Deus Optime Maxime, scrutator cordium ex errore in semitam jube ut revertatur; tu omnibus & singulis lucis tuae radium ita caelitûs infunde, ut intelligant in solâ tuâ Religione veram gloriam, veram utilitatem contineri; tu denique omnipotenter perfice, ut Catholicam Fidem de cunctis Dissidentum minis, ac perturbationibus triumphare in hoc Regno videamus. Dixi: (x) *Spiritus Domini loquutus est per me, & sermo ejus per linguam meam; (y) vos quae & didicistis, & audistis haec agite, & Deus pacis erit vobiscum.*

(r) Luc. 12. 31.

(s) ex Epist. Cath. Sancti Barnabae Apost. **V.** 21.

(t) Prov. 3. 26.

(u) Gal. 5. 7.

(x) 2. Reg. 23. 2.

(y) Phil.



Biblioteka Jagiellońska



stdr0024467

